

摘藻堂四庫全書薈要

子部

欽定四庫全書薈要卷一萬五百九十九子部

御定佩文齋廣羣芳譜卷三十六

花譜

海棠二

集藻五言排律增唐薛能海棠酷烈復離披玄功莫我  
知青苔浮落處暮柳間開時帶醉游人插連陰被叟移  
晨前清露濕晏後惡風吹香少傳何計妍多畫半遺島  
蘇漣水脉庭綻粒松枝偶泛因沈硯閒飄欲亂碁遶山

生玉壘和郡徧坤維負賞慙休飲牽吟分失機明年應  
不見畱此贈巴兒 宋王禹偁商山海棠錦里名雖盛  
商山艷更繁別疑天與態不類土生根淺著紅蘭染深  
於絳雪噴待開先釀酒怕落預呼魂香裏無勑敵花中  
是至尊桂須辭月窟桃合避仙源浮動冠頻側霓裳袖  
忽翻望夫臨水石窺客出墻垣贈別難饒柳忘憂肯讓  
萱輕輕飛燕舞脉脉息嬌言蕙陋虛侵徑梨凡浪占園  
論心畱蝶宿低面厭鶯喧不忝神仙品何辜造化恩自

期栽御苑誰使擲山村綺季荒祠畔仙娥古洞門烟愁  
思舊夢雨泣怨新婚畫恐明妃恨移同卓氏奔祇教三  
月見不得四時存繡被堆籠勢臘脂浥淚痕貳車春未  
去應得伴芳樽石延年和樞密侍郎因看海棠憶禁

苑此花最盛君看海棠格羣花品詎同嬌嬈情自富蕭  
散艷非窮舊穀斑吳苑梅羅碎蜀宮錦窠杯裏影繡段  
隙前烘心亂香無數莖柔動滿叢意分巫峽雨腰細漢  
臺風盛若霞藏日鮮於血灑空高低千點赤深淺半開

紅妝指朱纔布膏唇檀更融色焦無可壓體瘦不成豐  
枝重輕浮外苞疎密閤中難勝蜂不定易入蝶能通

宋祁蜀海棠蜀國天餘煦珍葩地所宜濃芳不隱葉併  
艷欲燃枝褰影分羣萼均霞點萬蕤回文錦成後夾煎  
燎烘時蜂蕊迎銜密鶯梢向坐危淺深雙絕態啼笑兩  
妍姿絳節排烟竦丹釭落蒂垂童容障畏薄便面到憂  
遲媚日能徐照暄風肯遽吹惜歡當晚晚畱恨付離披  
麗極都無比繁多僅自持損香饒麝柏照影欠瑤池畫

要精侔色歌須巧騁辭舉樽頻語客細摘玩芳期  
海棠西域流根遠中都屬賞偏初無可並色竟不許勝妍  
薄暝霞烘爛平明露濯鮮長衾繡作地密帳錦為天淺  
影才欹檻橫柯欲照筵愁心隨落處醉眼著繁邊的  
誇妝靚番番恃笑嗎何嘗問蘭媚要是掩櫻然艷足非  
他譽香輕且近傳所嗟名後出遺載楚臣篇 楊諤和  
燕龍圖海棠西漢欺盧橘東陽愛野棠許昌奇此遇子  
美欠先揚杜宇三春艷蠶叢一國香  
脂點亂雨生色

麗斜陽富艷東君節暄妍白帝方錦樓祈水色玉壘換  
山光風格林檎細腰肢郁李長天生笑容質時樣舞衣  
裳少吐深深染全開淡淡妝烟媒護綠蒂風陣損朱房  
旋失因臨水閒飄弗過墻佩亡愁殺甫簪脫即連姜蝶  
舞菱花照鶯啼罨畫堂仙如弄玉少墜似綠珠常不見  
還成悔相思幾欲狂春深濯錦水日晚浣紗方臥對移  
簾桺吟看近筆牀池清滿園倒鳥起一枝昂紫燕銜泥  
急黃蜂趁蜜忙化工眞用意銷得與攜觴沈立海棠

百韻岷蜀地千里海棠花獨妍萬株佳麗國二月艷陽

天叢萼勻如布修蕤巧似編彤雲輕點綴赤玉碎雕鐫  
瑟瑟光輪瑩猩猩血借鮮淺深相向背疎密遞勾牽輕  
倩重重染丹砂細細研蕊纖金粟拱鬚嫩紫絲拳紅蠟  
隨英滴明璣著顆穿初莖爭裊娜翹幹共踟躕絕代知  
無價生香不減殘分靈應桂苑鍾粹定星躔木帝經邦  
相花王入室賢祥飈如翦拂卿霽共陶甄眞宰陰推轂  
勾芒與著鞭不須憂薄命好為惜流年贊翼施生柄扶



持照嫗權主張韶令正調燮淑威宣和氣高低洽芳心  
次第還金釵人十二珠履客三十雲雨迷巫峽風波怨  
洛川娉婷宜住楚妖冶合居燕繡被通宵展華燈徹曙  
燃橫披前檻外半出假山巔暗羨遊蜂採偷輸蟻穴沿  
瘦嫌蛛網纖柔怯女蘿纏蓄恨憑誰訊無言只自憐文  
君酒壚畔揚子草堂前品格生來別風流到老全繁中  
生悵望衆裏見喧闐暄暖精神出清明意態便關關鶯  
對語兩兩燕高騫天上宜封殖人間偶竚延共櫻圍別

館與杏擁斜阡清暖簾爭卷黃昏幕尚褰低籠金輦輅  
高映畫鞦韆忽認梁園妓深疑閨苑仙忽忽來蕙圃遠  
遠別芝田羞隱暎霧輕如淡蕩烟乍逢開羽扇初喜  
下雲駢髣髴向星靨依稀帶翠鈿五銖衣宛轉七寶帳  
翩翩獨立揆霓節成行列彩旃困宜欹虎枕步好覩金  
蓮舞定休回袖妝濃不傳鉛蓋張松鬱鬱茵藉草芊芊  
馥郁蘭供夢扶蘇柳伴眠軀輕彌綽約腰細更便嬛姪  
姪常顙若幽柔自灑然侍兒羅白芷婢子列芳荃口口

濃檀注腮腮薄粉填解圍施葉幄買笑有榆錢倚旒環  
瑤席婆娑匝玳筵嬌依屏曲曲泣對露涓涓南陌輕埃  
蔽東郊夕照連幾時休縹緲從此識嬋娟是處遺簪珥  
誰家不管絃妬姬貪恐失戲稚惜何顛折閃搔頭褪擎  
縱約腕揎戴遮鬟上鳳裝壓鬢邊蟬汲引新懽聚消磨  
宿忿蠲縱觀須倒載命宴必加箋翻曲教歌媛更詞送  
酒船鄉心須暫解病眼當時痊迢遞來油壁從容住錦  
韉雅宜交讓比穠與棣華聯不憤參朱槿寧甘混木綿

酴醾潛失色躑躅敢差肩素柰思投迹天桃恥備員  
梧桐愧金井芍藥濫花磚併壓辛夷俗潛排寶馬薦  
天恩無久恃人寵莫長專布影交三徑敷榮徧一廛  
凝眸方曄曄回首旋翩翩可忍驚飈挫胡煩急景煎  
珊瑚隨手碎絳雪繞枝旋拂漢霞初散當樓月自圓  
飄零隨蟻蠓散亂逐漪漣灼灼龜城外亭亭錦水邊  
抱愁應慘感有淚即潺湲午影迷蝴蝶朝寒怨杜鵑  
物情元倚伏人意莫拘攣擢秀高羣木稱珍極八埏  
未開獨脉脉憂落固

悃悃別著新文紀重尋舊譜箋共知紅艷好誰辨赤心

堅實似陪朱李根宜灌醴泉栽須鄰竹柏樹莫繞烏鳶

恥託膏腴茂當隨富貴遷為多猶底滯因遠尚迤邐客

思易成亂心期未省愆畫思摩詰筆吟稱薛濤牋醉目

休頻送詩情豈易緣薛能誇麗句鄭谷賞佳篇止感芳

姿美那憐託地偏山經猶罕記方志未多傳巧詠憂才

竭冥搜得意詮遐陬寡真賞僻境忍輕捐抽祕慚非據

探奇敢讓先援毫叙名卉聊用放懷焉程敦厚和冬

曦海棠花中名品異人重比甘棠苞嫩相思密紅深琥珀光好風傳馥郁凡卉愧芬芳爛熳雲成瑞歲蕤女有嬌生來先蜀國開處始朝陽賞即笙歌地題稱翰墨場烟霞容易散蜂蝶等閒忙誰是多情侶欄邊重舉觴

七言排律增宋張洎內署書閣前海棠花盛開率爾七言八韻寄長卿諫議去歲海棠花發日曾將詩句詠芳妍今來花發春依舊君已雄飛玉案前驟隔清塵樞要地獨攀紅蕊艷陽天疎枝高映銀臺月嫩葉低含綺閣

烟花落花開懷勝賞春來春去感流年清辭早綴巴人  
唱妙翰猶緘蜀國箋共仰芳圖方赫爾自嗟衰鬢轉皤  
然因憑鶯蝶傳消息莫忘蓬萊有病仙 張冕海棠海  
棠栽植徧塵寰未必成都欲詠難山木瓜開千顆顆水  
林檎發一攢攢初疑紅豆爭頭綴忽覺臘脂衆手丸西  
蜀僧家根撥小南荆官舍樹枝寬高穿羣木無因蔽平  
倚危樓最好看十畝園林渾似火數家池面悉如丹錦  
袍萬丈仍連袂珠被齊光更合歡風嫋細腰妝正罷露

晞銅雀淚新乾晨曦遠借彤雲暖秋魄微侵甲帳寒會  
讌豈勞供幄幙採香應見費龍檀穠燒游女青絲髮殷  
染妖姬白玉冠賓席半移隈茜綬使車多熟簇雕鞍層  
層排朶紫飛蝶密密交柯宿翠翰詩客早慙矜鏤管畫  
工誰敢銜霜紈本期相伴十場醉可忍輕邀百卉殘川  
路尚移隨迅瀨蕃船猶折出長瀾飄零絳雪深盈尺收  
拾晴霞散結團時去獨應賢者識色空潛有達人觀譜  
為仙子終須美實作寒梅況不酸五六年來離別恨春



宵頻夢石臺盤

元馬祖常畫海棠圖石家五尺珊瑚

樹海國千房火齊珠風雨春寒圍錦護艷陽天暖倚欄  
扶浣時應貯芙蓉水香處重熏翡翠爐紅膩不隨蜂嘴  
蝕粉勻終為蝶身數歲蕤綵結盤仙綬襪積雲羅落舞  
襦青帝化成非幻有杜陵吟老却知無催開每賴斟鸚  
鵡吹落還因唱鷓鴣曾見赤城花亞蕊丹鉛此去不須

圖

五言絕句增宋晏殊海棠濯錦江頭樹移根藥砌中只

應春有意偏與半妝紅  
陳與義海棠花葉兩分明春  
陰耿簾幕東風吹不斷日暮  
臙脂薄  
洪适黃海棠漢  
宮嬌半額雅澹稱花仙天與  
溫柔態妝成取次妍  
垂  
絲海棠脉脉似崔徽朝朝長  
著地誰能解倒懸扶起雲  
鬟墜  
楊萬里海棠艷翠春鋪骨  
妖紅醉入肌花仙別  
無訣一味惱臙脂

七言絕句原唐賈島海棠二  
首名園對值幾經春露蕊  
烟梢畫不真多謝許昌傳雅  
什蜀都曾未遇詩人  
昔

聞遊客話芳菲濯錦江頭幾萬枝縱使許昌持健筆可

憐終古媿幽姿

增鄭谷蜀中賞海棠濃淡芳春滿蜀

鄉半隨風雨斷鶯腸浣花溪上空惆悵子美無心為發

揚原吳融海棠雪綻霞鋪錦水頭占春顏色最風流

若教更近天街種馬上多逢醉五侯

增宋光宗會僚

屬賞海棠偶有題詠濃淡名花產蜀鄉半含風露浥新

妝嬌嬈不減舊時態誰與丹青為發揚

王禹偁別堂

後海棠一堆紅雪媚青春惜別須教淚滿巾好在明年

莫憔悴校書無是愛花人 郭震海棠又隨桃李一時

榮不逐東風處處生疑是四方嫌不種教於蜀地獨垂

名 宋祁海棠萬萼霞乾照曙空向來心賞已多同未

知此日家園樂數徧繁枝袞袞紅 趙抃答贛縣錢顗

著作移花令尹憐花意思勤海棠多種郡園新自從西

蜀年年見今日欄邊似故人 韓維展江亭海棠四首

占盡人間麗與華白頭判得醉流霞誰將法錦翻新樣

紅綠裝成徧地花 昔年曾到蜀江頭絕艷牽心幾十

秋今日欄邊見顏色夢魂不復過西州  
紅糝裝條弱

弱長人間不合有天香千觴未足酬佳麗回首東風更

斷腸 又避寒風與暖曦年年長此探花期如今太守

尤珍愛只許宮娥戴一枝 王安石海棠綠嬌隱約眉

輕掃紅嫩妖嬈臉薄妝巧筆寫傳功未盡清才吟詠興

何長 文同和何靖山人海棠為愛香苞照地紅倚欄

終日對芳叢夜深忽憶南枝好把酒更來明月中 原

蘇軾海棠東風弱弱汎崇光香霧霏霏月轉廊只恐夜

深花睡去高燒銀燭照紅妝  
增趙次公和東坡海棠

露氣熏微帶曉光枝邊燦煥映迴廊  
細看素臉原無玉

初點顰脂駐靚妝  
張舜民移岳州去房陵道中見海

棠馬息山頭見海棠羣仙會處錦屏張  
天寒日晚行人

絕自落自開還自香  
張耒晁二家海棠去歲花開呼

杜卿家小娃歌舞花下今春花復開  
而杜已出守戲以

詩調之頗疑蜂蝶過隣家知是東牆去  
歲花駿馬無因

迎小妾鷓鴣何用強隨車  
原崔鷓鴣海棠渾是華清出

浴初碧綃斜掩見紅膚便教桃李能言語要比嬌妍比  
得無 增陳與義海棠三首海棠點點要詩催日暮紫  
綿無數開欲識此花奇絕處明朝有雨試重來 紅妝  
翠袖一番新久向園林作好春却笑華清誇睡足只今  
羅襪久無塵 深院無人春日長遊蜂來往燕飛忙海  
棠嬌甚成羞澀憑仗東風催曉妝 周必大次韻楊廷  
秀并序萬花川谷主人為海棠賦二首妙絕古今斷章  
有平生不帶看花福不是愁中即病中之歎代花次韻

江國羣芳自有餘詩才酒興不愁無却憐西蜀移根遠  
醉向東風落筆初 傅粉施朱淡復濃不辭沐雨更梳  
風豈知命似佳人薄不在吾公樂事中 范成大垂絲

海棠春工葉葉與絲絲怕日嫌風不自持曉鏡為誰妝  
未辨沁痕猶有淚黯黯 賞海棠三絕芳春隨分到貧

家兒女多情惜歲華聊為海棠修故事去年燈燭去年  
花 燭光花影兩相宜占斷風光二月時但得常如妃  
子醉何妨獨欠少陵詩 憶向宣華夜倚欄花光妍暖



月光寒如今蹋颿嫌風露且只銅瓶滿插看 聞石湖

海棠盛開亟攜家過之東風花信十分開細意留連待

我來開過十分風不動更無一片點蒼苔 家人扶上

錦城頭蜂蝶團中爛熳遊報答春光須小醉紅雲洞裏

按伊州 低花妨帽小攜筇深淺臘暗一萬重不用高

燒銀燭照暖雲烘日正春濃 陸游海棠二首十里迢

迢望碧雞一城晴雨不曾齊今朝未得平安報便恐飛

紅已作泥 蜀地名花擅古今一枝氣可壓千林譏彈

更到無香處常恨人言太刻深  
楊萬里張功父南湖

海棠杖藜走筆看盡都城種海棠只將一徑引教長約

齋妙出春風手人在中央花四傍  
天公信手灑明霞

若遣停勻未必佳却得數株多葉底殷勤襯出密邊花

垂絲海棠無波可照底須窺與柳爭嬌也學垂破曉

驟晴天有意生紅新曬一鉤絲  
張栻所思亭海棠初

開折贈兩使者未須比擬紅深淺更莫平章香有無過  
雨夕陽樓上看千花容有此膚腴  
東風著物本無私

紅入花梢特地奇想得霜臺春思滿一枝聊遣博新詩

陳傅良海棠淡月看花似霧中遽呼燈燭倚花叢夜  
來月色明如晝却向庭蕪數落紅 吳芾寄朝宗海棠

已作十分妝細看妖嬈更異常不得與君同勝賞空燒  
銀燭照紅光 和陳子良海棠四首春來人物盡熙熙

紅紫無情亦滿枝正引衰翁詩思動舉頭那更得君詩  
花開春色麗晴空惱我狂來只遶叢試問妖嬈誰與  
比一株勝却萬株紅 雨後花頭頗覺肥細看還是舊

風姿坐餘自有香芬馥不許凡人取次知  
十年栽種滿園花無似茲花艷麗多已是譜中推第一不須還更問如何  
海棠海棠元自有天香底事詩人故謗傷不信請來花下坐惱人鼻觀不尋常  
王之道題苦竹寺

海棠洞翠袖朱唇一笑開倚風無力競相偎陽城豈是僧家物端恐齊奴步障來  
戴復古海棠十月園林不雨霜朝曦赫赫見秋陽夜來聽得游人語不見梅花見海棠  
劉克莊海棠三首萬紅夾路笑相迎髻前身

石曼卿若向花中論富貴芙蓉城劣海棠城 幾樹繁

紅映碧灣亭羅山下見芳顏分明消得黃金屋却墮荒

溪野徑間 色深乍擣守宮紅片片俄隨蛺蝶風到得

離披無意緒精神全在半開中 程敦厚惜海棠晚開

今年春色可勝嗟二月山中未見花長憶去年今夜月

海棠花影到窓紗 雨中海棠玉脆紅輕不耐寒無端

風雨若相干曉來試捲珠簾看簌簌飛香滿畫闌 僧

惠洪海棠酒入香腮笑未知小妝初罷醉兒癡一枝柳

外牆頭見勝却千叢著雨時 金蔡松年黃海棠輕如

紅豆排冰雪一拂新鶯色更奇不覺濃陰破明玉有情

誰解賞離披 王世昌方城東寺海棠苦荳如鍼草有

芒桃花輕薄絮顛狂少陵例有詩沾丐只枉無言到海

棠 元好問同兒輩賦未開海棠二首翠葉輕籠豆顆

勻黤暗濃抹蠟痕新殷勤留著花梢露滴下生紅可惜

春 枝間新綠一重重小蕾深藏數點紅愛惜芳心莫

輕吐且教桃李鬧春風 元黃庚海棠臉暈輕紅酒力

微真妃半醉夜深時杜鵑叫落花梢月獨倚東風睡不  
知 歐陽玄為浪溪題折枝海棠點綴春風只一枝此  
花猶是半開時更令老杜如今見便是無情也賦詩  
尹廷高臘月海棠尤物真能奪化工臘前偷泄數枝紅  
霜花不上臙脂面強飾春妍嫁北風 楊維禎折枝海  
棠金屋銀釭照宿妝一枝分得錦雲鄉梅郎底事多餘  
恨怪殺珊瑚不肯香 馬臻海棠殷紅含露滴朝寒疑  
是春工畫未乾底事詩人吟不穩直須燒燭夜深看

明高啓西齋庭前海棠寂寥銀燭與金盤睡足簾前怯  
曉寒不是詩人賞幽興雨中深院有誰看 楊慎興教

寺海棠兩樹繁花占上春多情誰是惜芳人京華一朵  
千金價肯信空山委路塵 黃姬水天妃宮看西域海

棠仙觀臺荒蔓草中海棠一樹太憎紅可憐亦是星槎  
物不學葡萄入漢宮 董少玉海棠花小樓風定月初  
斜紫玉新枝綰落霞睡起不堪重秉燭春來愁煞海棠  
花 原張新雨滋霞襯入朱顏月下疑從姑射還最是



春工多巧思著將色在淺深間

詩散句原宋楊萬里不關殘酒醉難醒不為春愁嬾散

中自是新晴生睡思起來無力對東風 斯菴宛轉風

前不自持妖嬈微傅淡黯脂花如翦彩層層見枝似輕

絲裊裊垂 唐韓偓海棠花在否側臥捲簾看 增宋

高惟幾使梅休妬白仙杏已輸紅 王十朋詩裏稱名

友花中占上游 唐張蠩獨倚闌干正惆悵海棠花裏

鷓鴣啼 原韓偓鬱鬱蒼髯真道友絲絲紅萼是鄉人

海棠花下鞦韆畔背人撩髻道匆匆  
增宋王安石

纔經暖律移新歲旋見繁紅滿故枝  
蘇轍驟暄不為

海棠計長晝只添鸚鵡愁  
陳與義燕子不禁連夜雨

海棠猶待老夫詩  
范成大遲日溫風護海棠十分顏

色醉春妝  
原陸游露章夜奏通明殿乞借春陰護海

棠  
曉來強自試新妝倦整金蓮看海棠  
楊萬里故

園今日海棠開夢入江西錦繡堆  
增王十朋杜陵應

恨未曾識空向成都結草堂  
陳傅良未曉啼鶯相喚

語海棠飛盡一庭紅 嚴粲過了海棠人不省夢中姑

自詠梅花 原杜仝海棠正好東風惡狼籍殘紅襯馬

蹄 增朱淑真桃羞艷冶應回首柳妬妖嬈祇皺眉

元潘伯修春寒玉帳花陰合夜照香篝藥氣濃 釋至

仁月裏精神今更好雨中顏色向來新 宋戴復古紅

透海棠嬌 元黃庚錦棠紅濯雨 宋陳與義暮雨霏

霏濕海棠 陸游萬枝暱血海棠紅 元劉秉忠海棠

微露濕臙脂

詞增宋吳潛如夢令江上綠楊芳草想見故園春好一  
洞海棠花昨夜夢魂飛繞驚曉驚曉牕外一聲啼鳥

王十朋點絳脣絲蕊垂垂嫣然一笑新妝就錦亭前後  
燕子來時候誰恨無香試把花枝嗅風微透細熏錦

袖不止嘉州有王安石菩薩蠻海棠亂發皆臨水君

知此處花何似涼月白紛紛香風隔岸聞轉枝黃鳥

近隔岸聲相應隨意坐莓苔飄零酒一杯劉儼菩薩

蠻東風去了秦樓畔一川烟草無人管芳樹雨初晴黃

鸝三兩聲 海棠花已謝春事無多也只有牡丹時知

他歸不歸 葉夢得卜算子嬌艷醉楊妃輕裊憐飛燕

人在昭陽睡足時初試妝深淺 一段錦新裁萬里來

何遠高燭休教照夜寒媚臉融春暖 劉克莊卜算子

片片蜨衣輕點點猩紅小道是天工不惜花百種千般

巧 朝見樹頭繁暮見枝頭少道是天工果惜花雨洗

風吹了 又盡是手栽成合得天饒借風雨於花有底

讐著意相陵藉 做暖逼教開做冷催教謝不負明年

花下人只負栽花者 原晏殊訴衷情海棠枝綴一重

重清曉近簾櫳 脂誰與勻染偏向臉邊濃 看葉嫩

惜花紅意無窮如花如葉歲歲年年共占春風 增張

孝祥錦園春醉痕潮玉愛柔英未吐露華如簇絕艷矜

春分流芳金谷 風梳雨沐耿空抱夜闌清淑杜老情

疎黃州賦冷誰憐幽獨 李廌南鄉子十月小春天紅

葉紅花半雨烟點滴紅酥真耐冷爭先奪取梅魂鬪雪

妍 坐待曉鶯遷織女機頭蜀錦鮮枝上綠毛么鳳子

飛仙乞取雙雙作被眠 原范成大醉落魄馬蹄塵撲

春風得意笙歌逐款門不問誰家竹只揀紅妝高處燒

銀燭 碧雞坊裏花如屋燕王宮下花成谷不須悔唱

關山曲只為海棠也合來西蜀 增京松坡醉落魄芳

塵休撲名花喚我相隨逐淺妝不比梅欺竹深注朱唇

妝面稱紅燭 阿嬌合貯黃金屋是誰却遣來空谷酞

顏徧倚闌干曲一段風流不枉到西蜀 王道輔蝶戀

花濯錦江頭春欲暮枝上繁紅著意留春住祇恐東君

嫌面素新妝勝把顰脂傳 曉夢驚寒初過雨寂寞珠

簾問有餘花否悵望草堂無一語丹青傳得凝情處

張材甫蝶戀花前日海棠猶未破點點顰脂染就真珠  
顆今日重來花下坐亂鋪宮錦春無那 勝摘繁枝簪

幾朵痛惜深憐只恐芳菲過醉倒何妨花底臥不須紅  
袖來扶我 明仁宗蝶戀花烟抹霜林秋欲困吹破顰  
脂便覺西風潤翠袖怯寒愁一寸誰家庭院黃昏信

明月修容生遠恨旋摘餘嬌簪滿佳人鬢醉倚小欄花



影近不應先有春風分 宋張奕璫人嬌多少黯暗勻

成點就千枝亂攢紅堆繡花無長好更光陰去後對景  
憶良朋故應招手 曾記年時花開把酒枉淋淋春衫

濕透文園今病問速能來否却道有荼蘼牡丹時候

張孝祥感皇恩常歲海棠時偷閒須到多病尋芳懶春

老偶來恰值半謝妖嬈猶好便呼詩酒伴同顛倒 繁

枝高蔭疎枝低繞紅底杯盤花影照多情一片怪我歸

來不早斷腸銷碎錦門前道 陳濟翁踏青游濯錦江

頭羞殺艷桃穠李縱趙昌丹青難比暈輕紅留淺素千

嬌百媚照綠水恰如下臨鸞鏡妃子弄妝猶醉詩筆

因循不曉少陵深意但滿眼傷春珠淚燕來時鶯啼處

年年憔悴便除是秉燭凭欄吟賞莫教夜深花睡晁

補之洞仙歌羣芳未盡是海棠時候雨過寒輕好晴晝

最妖嬈一樹全是初開雲鬟小塗粉施朱未就全開

還自好駘宕春餘百樣宮羅鬪繁繡縱無語也應心恨

我來遲恰柳絮將春歸後醉猶倚柔枝恰黃昏一點愁

須共花同瘦

劉克莊滿江紅老子年來頗自許心腸

鐵石尚一點銷磨未盡愛花成癖懊惱每嫌寒勒住丁

寧莫被晴烘拆柰暄風烈日太無情如何得張畫燭

頻頻惜憑素手輕輕摘更幾番雨過彩雲無迹今日不

來花下飲明朝空向枝頭覓對殘紅滿院杜鵑啼添愁

寂劉處靜燭影搖紅蜀錦華堂寶箏頻送花前酒妖

嬈全在半開時人試單衣後花面圍春競秀如紅潮玉

顚微透欲甦還睡淺酒扶頭朦朧晴晝金屋名姝恨

情空貯閒睂岫世間還有此娉婷拚盡珠量斗真艷可  
令消受倩鶯催天香共袖冷烟庭院淡月梨花空教春  
瘦 劉凝木蘭花慢漸秋空向晚被風雨趲重陽正木  
落疎林海棠枝上忽見紅妝料應妬他蘭菊任年年獨  
自占秋光故把春風嬌面向人逞艷呈芳 看來畢竟  
此花強祇是欠些香悄一似五陵公子却厭膏粱肯來  
水邊竹下與幽人相對說淒涼只恐夜深花睡五更微  
有清霜 謝邁念奴嬌綠雲影裏把明霞織就千重文

繡紫膩紅嬌扶不起好是未開時候半怯新寒半宜晴

色養得臉脂透小亭人靜嫩鶯啼破清晝猶記攜手

芳陰一枝解帶嬌艷波雙秀小語輕憐花總見爭得似

花長久醉淺休歸夜深同睡明月還相守免教春去斷

腸空嘆詩瘦馬莊父水龍吟東君直是多情好花一

夜都開盡杏梢零落藥欄遲暮不教寧靜風度秋千日

移簾幕翠紅交映正太真浴罷西施濃抹都沈醉嬌相

稱磨徧綠窓銅鏡挽春衫不堪比並暮雲空谷佳人

何處碧苔侵徑睡裏相看酒邊凝想許多風韻問因何

却欠一些香味惹旁人恨 方岳水龍吟晝長庭院深

深春柔一枕流霞睡朦朧欲醒嬌羞還困錦屏圍翠豆

蔻初肥櫻桃微綻玉欄同倚記華清欲起渭水流波暖

紅漲棄暗水 燕子來時天氣儘韶風與他為地芳叢

雨歇霞痕日釀英英仙意莫恨無香最憐有韻天然情

致待問春能幾五更猶是拚今宵醉 王十朋二郎神

深深庭院夜雨過簾櫳高捲正滿檻海棠開欲半仍朶

朶紅深紅淺遙認三千宮女面  
勻點點臙脂未徧更微帶春醪  
宿醉裊娜香肌嬌嬾日暖芳心  
暗吐含羞輕顫笑繁杏夭桃爭  
爛漫愛容易出墻臨岸子美當  
年游蜀苑又豈是無心眷戀都  
只為天然體態難把詩工裁翦  
劉克莊摸魚兒甚春來冷烟淒  
雨朝朝遲了芳信驀然乍暖晴  
三日又覺萬株嬌困霜點鬢潘  
令老年年不帶看花分才情減  
盡悵玉局飛仙石湖絕筆辜負  
這春韻傾城色懊惱佳人薄命  
墻頭岑寂誰問東風日

暮無聊賴吹得臘脂成粉君試認花共酒古來二事天  
尤各年光去迅漫綠葉成陰青苔徧地做取異時恨

別錄原王禹偁詩話杜子美避地蜀中未嘗有一詩說  
著海棠以其生母名海棠也 增韻語陽秋杜子美居

蜀累年吟咏殆徧海棠奇艷而詩章獨不及何耶鄭谷  
詩云浣花溪上空惆悵子美無心為發揚是已本朝名  
士賦海棠甚多往往皆用此為實事如石延年云杜甫  
句作畧薛能詩未工錢易詩云子美無情甚都官著意



頻李定詩云不需工部風騷力猶占勾芒造化權獨王  
荆公用此作梅花詩最為有意所謂少陵為爾牽詩興  
可是無心賦海棠也 墨客揮犀李丹大夫客都下一

年無差遣及授昌州倅議者以去家遠乃改授鄂州彭  
淵材聞之吐飯大步往謁李曰誰為大夫謀昌佳郡也  
奈何去之李驚曰供給豐乎曰非也民訟簡乎曰非也  
曰然則何以知其佳淵材曰海棠無香昌州海棠獨香  
非佳郡乎聞者傳以為笑 原蜀檇杭潘炕有嬖妾解

愁姓趙氏其母夢吞海棠花蕊而生頗有國色善為新

聲冷齋夜話彭淵材曰平生所恨者五事人問其故

淵材不言久之曰吾論不入時聽恐汝曹輕易之問者

力請乃答曰第一恨鮓魚多骨二恨金橘太酸三恨蓴

菜性冷四恨海棠無香五恨曾子固不能詩聞者大笑

淵材瞠目答曰諸子果輕易吾論也東坡海棠詩曰

只恐夜深花睡去故燒銀燭照紅妝事見太真外傳明

皇登沈香亭召太真妃於時卯醉未醒命力士使侍兒

扶掖而至妃子醉顏殘妝髻亂釵橫不能再拜明皇笑  
曰豈妃子醉直海棠睡未足耳 增冷齋夜話前輩作

花詩多用美女比其狀如曰若教解語應傾國任是無  
情也動人誠然哉山谷作酴醾詩曰露濕何郎試湯餅  
日烘荀令炷爐香乃用美丈夫比之特若出類而吾叔  
淵材作海棠詩又不然曰雨過溫泉浴妃子露濃湯餅  
試何郎意尤工也 詩話總龜東坡謫居齊安時以文  
筆游戲三昧齊安樂籍中李宜者色藝不下他妓他妓

因讌席中往往得詩宜獨以語訥不能請及坡將移臨  
汝於飲餞處宜奉觴再拜取領巾乞書公顧視久之令  
宜磨硯墨濃取筆大書東坡五歲黃州住何事無言及  
李宜即擲筆袖手與客笑談坐客相謂語似凡易又不  
終篇何也至將徹具宜復拜請坡大笑曰幾忘出場繼  
書云恰似西川杜工部海棠雖好不留詩一座擊節盡  
歡而散就印錄張寶用鴨卵殼以金絲鏤海棠花名  
鮫胎盞雲蕉館紀談明昇在重慶取浮江青蜨石為

茶磨令宮人以武隆雪錦茶碾之焙以大足縣香霏亭  
海棠花味倍於常海棠無香獨此地有香焙茶尤妙

原栽接海棠性多類梨核生者十數年方有花都下接  
工多以嫩枝附梨而贅之則易茂種宜壚壤膏沃之地  
貼梗海棠臘月於根傍開小溝攀枝著地以肥土壅之  
自能生根來年十月截斷二月移栽櫻桃接貼梗則成  
垂絲梨樹接貼梗則成西府又春月取根側小本種之  
亦易活或云以西河柳接亦可海棠色紅接以木瓜則

色白亦可以枝插不花取已花之木納於根跗間即花  
花謝結子翦去來年花盛而無葉澆灌瑣碎錄云海  
棠花欲鮮而盛於冬至日早以糟水澆根下或肥水澆  
或盪過麻屑糞土壅培根下使之厚密纔到春暖則枝  
葉自然大發著花亦繁密矣一云此花無香而畏臭故  
不宜灌糞一云惟貼梗忌糞西府垂絲亦不甚忌止惡  
純濃者耳插瓶薄荷包根或以薄荷水養之則花開  
耐久

附錄 秋海棠

原一名八月春草本花色粉紅甚嬌艷葉綠如翠羽此  
花有二種葉下紅筋者為常品綠筋者開花更有雅趣  
彙考原採蘭雜志昔有婦人懷人不見恒灑淚於北墻  
之下後灑處生草其花甚媚色如婦面其葉正綠反紅  
秋開名曰斷腸花即今秋海棠也 于若瀛曰秋海棠  
喜陰生又宜卑濕莖歧處作淺絳色綠葉文似朱絲婉  
媚可人不獨花也 增學圃餘疏秋海棠嬌好宜于幽

砌北牕下種之傍以古拙一峰菖蒲翠筠草皆其益友也  
荆溪疏善卷後洞秋時海棠千本并著花一壑皆丹  
瓶史秋海棠嬌然有酸態鄭康成崔秀才之侍兒也  
瓶花譜秋海棠四品六命

集藻五言律詩原明王士騏題秋海棠是花偏灼灼開  
處幾叢叢弱質不禁露幽懷欲訴風空庭聊取媚傍石  
若為容黃菊紛相應餐英未許同 鍾惺詠秋海棠墻  
壁固吾分烟霜亦是恩光輕偏到蒂命薄幸餘根笑泣



誰能喻榮衰不敢論年年秋色下幽獨自相存

七言絕句原明俞琬綸詠秋海棠薄羅初試怯風淒小  
樣紅妝著雨低一段妖嬈描不就非關子美不能詩  
春色先應到海棠獨留此種占秋芳稀疎點綴猩紅小  
堪佐黃花薦客觴


別錄原性好陰而惡日一見日即瘁喜淨而惡糞宜盆  
栽寘南墻下時灌之枝上有種落地明年自生根夏便  
開花四圍用碎瓦鋪之則根不爛老根過冬者花更茂

浸花水飲之害人

御定佩文齋廣羣芳譜卷三十六

謹案卷三十五第二頁後七行若冕言則江西人  
正謂棠梨花耳刊本脫則字據陳思海棠譜增  
卷三十六第十三頁前一行譏彈更到無香處刊  
本到訛道據劍南集改





總校官庶吉士臣侍朝

校對官編修臣王福清

騰錄舉人臣勵守訓

欽定四庫全書薈要

子部

御定廣羣芳譜卷三十七

詳校官主事<sub>臣</sub>陳木

欽定四庫全書薈要卷一萬六百子部

御定佩文齋廣羣芳譜卷三十七

花譜

玉藥

按宋祁曰維揚州后土廟有花正白曰玉藥王禹偁愛賞之更稱曰瓊花魯慥曰今瑒花即玉藥花魯直更其名為山礬皆非也今以周必大玉藥辨證為據分為三譜諸說詳載於後

以備

參考

原周必大玉藥辨證條蔓如荼蘼冬凋春茂柘葉紫莖玉藥花苞初甚微經月漸大暮春方八出鬚如冰絲上





綴金粟花心復有碧筩狀類膽瓶其中別抽一英出衆  
鬚上散為十餘藥猶刻玉然 增全芳備祖玉藥枝條  
髣髴葡萄葉類柘葉之尖圓梅葉之厚薄花類梅而萼  
瓣縮小心微黃類小淨瓶暮春初夏盛開葉獨後凋其  
花白玉色其香殊異其高丈餘是名玉藥

彙考原劇談錄上都安業坊唐昌觀舊有玉藥花甚繁  
每發若瑤林瓊樹元和中春物方盛車馬尋玩者相繼  
忽一日有女子年可十七八衣繡綠衣乘馬戎髻雙鬟

無簪珥之飾容色婉約迴出於衆從以二女冠三女僕  
僕者皆巾頭黃衫端麗無比既下馬以白角扇障面直  
造花所異香芬馥聞於數十步之外觀者以為出自宮  
掖莫敢逼而視之佇立良久令小僕取花數枝而出將  
乘馬迴謂黃冠者曰曩者玉峰之約自此可以行矣時  
觀者如堵咸覺煙霏鶴唳景物輝煥舉轡百步有輕風  
擁塵隨之而去須臾塵滅望之已在半天方悟神仙之  
遊餘香不散者經月餘日時嚴給事休復元相國劉賓

客白醉吟俱有聞玉藥院真人降詩 增李德裕招隱

山觀玉藥樹詩注內署沈大夫所居閣前有此樹每花落空中回旋久之方集庭際大夫草詔之夕皆邀予同玩 原蔡寬夫詩話李衛公玉藥花詩云玉藥天中樹金鑾昔共窺注以為禁林有此木吳人不識自文饒賞玩始得名此為潤州招隱山作也碑今裂為四段在通判廳中而招隱無復有此花矣詢之土人皆莫知為何物或云即今揚州后土祠瓊花是已自王元之始易其

名晏元獻常以李善文選注質之曰瓊乃赤玉與此花不類也 漁隱叢話沈傳師奉酬浙西尚書九丈招隱

山觀玉蘂戲書即事見懷之作丹徒令書其後云招隱玉蘂花以二公詩著名累經兵燬花偶存而刻本久失好事尋訪每不滿意住持置弗問者幾人矣普覺來主法席求用治刻本礧石重鐫游客玩花讀詩頓還三年舊觀良足嘉美自晉宋招隱名甲京口古松脩竹清泉幽洞播在談詠誇詡勝絕邇者採伐童赭實不副名

覺師培植掃剔立志弗倦加以年序蒼翠環合景物增  
邃師與此寺此詞同永其傳尚勉之哉 增高齋詩話

唐人題唐昌玉蘂詩云一樹瓏鬆玉刻成飄廊點地色  
輕輕女冠夜覓香來處惟有堦前碎月明今瑒花即玉  
蘂花也介甫以此瑒謂常用此瑒字蓋瑒玉名取其白  
耳魯直又更其名爲山礬謂可以染也廬陵段謙叔多  
聞士也家藏異書古刻至多有楊汝士與段二十二帖  
云唐昌玉蘂以少故見貴耳自來江南山山有之土人

取以供染事不甚惜也則知瑒花之為玉蘂斷無疑矣  
傅子容見此帖乃作絕句云比瑒更馨摠未佳要須博  
物似張華因觀異代前賢帖知是唐昌玉蘂花余放浪  
林泉之日久矣屢從樵夫野叟問所謂鄭花者指其木  
謂余曰此鄭木也其葉如凍青高二三丈或有小者亦  
丈餘暮春開花如凍青花雖香而甚烈全不旖旎但山  
谷云江南野中有一種小白花木高數尺春開極香與  
余所見全不類 韻語陽秋江南野中有小白花木高

數尺春間極香土人呼為瑒花瑒玉名取其白也魯直云荆公欲作傳而陋其名予謂名曰山礬野人取其葉以染黃不借礬而成色故以名爾嘗有絕句云高節亭邊竹已空山礬獨自倚春風是也近見曾端伯高齋詩話云此花即唐昌玉藥花也所謂一樹瓏鬆玉刻成飄廊點地色輕輕者以余觀之恐未必然玉藥佳名也此花自唐流傳至今當以玉藥得名不應舍玉藥而呼瑒魯直亦不應舍玉藥而呼山礬也豈端伯別有所據耶

容齋隨筆物以希見為珍不必異種也長安唐昌觀

玉蘂乃今場花又名米囊黃魯直易山礬者在江東彌  
山亘野殆與榛莽相似而唐昌所產至於神女下遊折  
花而去以踐玉峰之期不特俗士罕見雖神仙亦不識  
也玉蘂辨證唐人甚重玉蘂故唐昌觀有之集賢院  
有之翰林院亦有之皆非凡境也予往因親舊自鎮江  
招隱來遠致一本種之軒檻再歲始著花不久當成樹  
花蘂猶刻玉然花名玉蘂乃在於此宋子京劉原父宋



次道博洽無比不知何故疑為瓊花王元之知揚州但  
言未詳何本俗呼為瓊花子京何故以誣元之蔡君又  
引晏同叔之言以為證甚無謂也劉夢得雪藥瓊絲之  
句最為中的何必拘李善赤玉為之注耶柘音陣南史  
劉杳傳所謂柘酒者予嘗得醞法芳烈異常山谷似不  
必以杳傳為據循俗訛柘作鄭而江南鄉音又呼鄭為  
瑒復疑未安於是創山礬之名然二詩并序初未嘗及  
玉藥止因好事者偽作唐人帖故魯端伯洪景廬皆信

之其實諸公猶未見此花所謂信耳而不信目也 以  
玉蘂為瑒起於曾端伯予與段謙叔之子元愷同里巷  
往還至熟其父初無楊汝士帖小說難信類此 原全  
芳備祖戴顒字仲若捨宅為招隱寺寺在京口放鶴門  
外古竹院相望數里孤處於萬山荒涼之顛所由山徑  
石卵纍纍不絕如綫是名招隱寺有米元章隸碑以紀  
仲若之出處方丈有閣號招華梁昭明選文於中閣之  
左有亭名虎跑其泉清汎閣之右有亭名玉蘂巍扁其

上亭之下有玉蘂二株對峙一架土人僉言此花自唐迄今天下只二株亦猶瓊花之於維揚千餘年間凡幾遭兵燬幸存今唐長安白玉等觀及御史所居閣前往往不可稽考而僅餘此寺雖然李德裕沈傳師詩句可以究其終始欲天下皆知此花非山礬非瓊花其負出鮮儔而自成一家也故詳紀其本末云 長安志安業坊唐昌觀舊有玉蘂花乃唐昌公主所植

集藻五言古詩原唐王琪玉蘂花玉蘂生禁林地崇姿

亦貴散漫溪谷中蓬茨復何異清芬信幽遠素彩非妖  
麗蒼煙蔽山日瓊瑤為之晦歲久自扶踈巖深愈幽邃  
請觀唐相吟俗眼無輕視 唐昌觀中樹曾降九天人  
縑駕久何許雪英如舊春豈無遺佩者來效捧以顰

七言古詩增宋徐積玉女花二首并序部使者林公作  
玉藥二詩同使趙公屬和亦以見命因吟之為玉女焉  
楊花可與名玉妃楚花可與名玉女天上瑤臺是本居  
人在月宮合同處一點難容赤水霞平生冷笑巫山雨

此女持身色太嚴玉壁如盤求不許 國艷雖殊情太

少蛾眉不畫雙瞳瞭新就明河洗面來更佩明珠蹋瑤

草不用朱鸞與紫霞玉麒麟駕白雲車君看面上都無

邪更看身上都無瑕越王國女金可邀卓王孫女琴可

招更有秦王家弄玉嫁人只被愛吹簫 原鄭域維揚

后土廟瓊花安業唐昌宮玉蕊判然二物本不同喚作

一般良未是瓊花雪白輕壓枝大率形模八仙耳山溪

行路多見之樵夫摧殘如獮豸比之玉蕊似實非金粟

冰綵那有此花鬚中有碧膽瓶別出瓏璁高半指清磬  
靜夜衝九天招引瑤臺玉仙子乘風躍馬汗漫遊偷折  
繁香分月姊紫莖柘葉荼蘼條少到尋常人眼底翰林  
內苑集賢閣雨露承天近尺咫後人不識天上花又把  
山礬輕擬比葉酸而澀供染黃不著霜縑偏入紙江鄉  
老少知此名鄭栢瑒音無正字方言土諺隨舌訛烏馬  
成焉固應爾

五言律詩原唐李德裕招隱山觀玉藥樹戲書即事奉

寄江西沈大夫閣老玉蘂天中樹金閨昔共窺落英閑  
舞雪密葉乍低帷舊賞煙霄遠前歡歲月移今來想顏  
色還似憶瓊枝 沈傳師奉酬浙西尚書九丈招隱山  
觀玉蘂樹戲書即事見懷之作曾對金鑒直同依玉樹  
陰雪英飛舞近煙葉動搖深素萼年年密衰容日日侵  
勞君想華髮僅欲不勝簪 增羊士諤故蕭尚書瘿柏  
齋前玉蘂樹與王起居吏部孟員外同賞柏寢閑何時  
瑤華自滿枝天清凝積素風暖動芬絲留步蒼苔暗停

觴白日遲因吟茂陵草幽賞待妍詞

七言律詩增宋徐積瑤真詩二首有序淮南轉運林公  
次中所居之府有花一株舊名玉蘂公改曰瑤真即瓊  
花之別本也瓊赤玉也名其花者蓋誤矣楊楚二花同  
為一物而楚花獨得瑤名也真者天下之良貴也故因  
物而寓之則存乎其心者不問可知蓋未嘗不在乎其  
真也既名其花遂名其館謂山陽學官曰子能賦之否  
乎於是得律詩二章其亦庶乎述而賦之也此花所在



宜開館彼玉維瑤合比君每到黃昏成淡月却臨曉後

作團雲人間偽采何如質物裏孤芳自勝羣應笑馬嵬

坡下女太真為號繫黃裙不知記得瑤林否故國曾

陪閬苑春色貌易分渾是正性情雖辨總歸真紅塵世

上無雙物白雪宮中第幾人若問誰何名玉女一般嚴

靜敵霜神原楊東山題玉藥花纔入平園便有聲唐

昌觀裏久知名已堆玉璣分金粟更插銀花入翠嬰蘿

蔓春風滕薛長山礬香氣晉齊盟世間百卉應無限不

遇王公枉一生 增周必大去夏孫從之示玉藥佳篇  
時過未敢賡和今年此花盛開輒次嚴韻并以新刻辨  
證為獻食菜曾饗三百困種花重看一番新洞仙舊賞  
淪無跡工部高吟必有神疊雪雅宜歌白雪送春仍欲  
買青春向來偽帖今冰釋從此佳名編廣輪 次韻廷  
秀待制玉藥姑射山前雪照人長安水畔態尤真步搖  
翹玉中心整瓔珞塗金四面勻常笑荼蘼藏琅藥獨陪  
芍藥殿餘春自從唐氏來天女直到平園見後陳 趙

正則彥法司戶沿檄而歸玉藥已過追賦車字韻詩奉  
答春深遊客競繁華寶馬香輪帶麴車不為來看招隱  
樹有誰肯顧野人家飛飛粉蝶鬚相映皎皎銀蟾色共  
誇今得審言詩勝畫傳神何必趙昌花

五言絕句增唐鄭谷中臺題玉藥唐昌樹已荒天意眷  
文昌日晚微風起春時雪滿墻

七言絕句原唐嚴休復聞玉藥院真人降二首味道齋  
心禱玉宸魂消冷眼未逢真不如滿樹瓊瑤藥笑對藏

花洞裏人 羽車潛下玉龜山塵界何由覩薜顏惟有

無情枝上雪好風吹綴綠雲鬟 武元衡唐昌觀玉藥

花琪樹年年玉藥新洞中長閉影霞春日暮落英鋪地  
雪獻花無復九天人 張籍同嚴給事聞唐昌觀玉藥

院近有仙過因成絕句二首千枝花裏玉塵飛阿母宮  
中見亦稀應共諸仙鬪百草獨來偷折一枝歸 五色

雲中紫鳳車尋仙來到洞仙家飛輪回處無踪跡惟有

斑斑落地花 劉禹錫和嚴給事聞唐昌觀玉藥花下

有遊仙二首玉女來看玉樹花異香先引七香車攀枝  
弄雪時回首驚怪人間日易斜 雪蘂瓊絲滿院春羽

衣輕步不生塵君平簾下徒相問長記吹簫別有人

白居易酬嚴給事聞玉蘂花下有遊仙羸女偷乘鳳下  
時洞中潛歇弄瓊枝不緣嘯鳥春饒舌青瑣仙郎可得  
知 惜玉蘂花有懷集賢王校書起芳意將闌風又吹  
白雲離葉雪辭枝集賢雙詔校無閒日落盡瑤華君不知  
增元稹酬嚴給事聞玉蘂花下有遊仙弄玉潛過玉

樹時不教青鳥出花枝的應未有諸人覺只是嚴郎卜  
得知 原楊巨源唐昌玉藥花晴空素艷照霞新香灑  
天風不到塵持贈昔聞將白雪藥珠宮上玉華春 楊  
凝唐昌觀玉藥花瑤花玉藥種何年蕭史秦羸向紫烟  
時控綵鸞過舊邸摘花持獻玉皇前 增宋徐鉉和賈  
員外戩見贈玉藥花栽瓊瑤一簇帶花來便劖蒼苔手  
自栽喜見唐昌舊顏色為君判病酌金壘

詩散句增宋楊萬里團酥刻玉比未暇雅靜居然不塵

汙須信掇之天上奇細吐冰絲說心悰 劉允叔江南

春晚經行地賸有唐昌玉藥花露彩烟締無限態冰清

玉潤白成葩 劉克莊玉藥春陰密琅玕晚暑清 原

唐劉禹錫鳳池西畔圖書府玉樹玲瓏景氣閒 宋趙

清臣正是清燈深雨夜空傳玉藥發春晴 唐鄭畋小

閣涼添玉藥風

瓊花

聚八仙花  
附見譜內

增澠水燕談揚州后土廟有瓊花一株潔白可愛歲久

木大而花繁俗目為瓊花不知實何木也 齊東野語  
揚州后土祠瓊花天下無二本絕類聚八仙色微黃而  
有香仁宗慶歷中嘗分植禁苑明年輒枯遂復載還祠  
中敷榮如故淳熙中壽皇亦嘗移植南內逾年憔悴無  
花仍送還之其後宦者陳源命園丁取孫枝移接聚八  
仙根上遂活然其香色則大減矣今后土之花已薪而  
人間所有者特當時接本髣髴似之耳

彙考增聞見雜錄揚州后土廟有瓊花一株宋丞相郊



構亭花側榜曰無雙謂天下無別株也 廣陵志后土

廟瓊花本大而花繁天下無之孫冕過維揚使人訪之  
謂山中甚多但歲苦樵斧野燒故木不能大而花不能  
盛遂不為人所貴復傷之以詩曰可憐遐僻地常化燎  
原灰其說蓋誤以聚八仙為此花耳聚八仙花雖類瓊  
花而瓊花之異者其香如蓮花清馥可愛雖剪折之餘  
韻亦不減此聚八仙之所無也 韻語陽秋瓊花惟揚  
州后土祠中有之其他皆聚八仙近似而非鮮于子駿

詩云百藥天下多瓊花天上希結根託靈祠地著不可  
移八部冠羣芳一株攢萬枝而宋次道春明退朝錄云  
瓊花一名玉藥按唐朝唐昌觀有玉藥花王建詩所謂  
女冠夜覓香來處惟有階前碎月明是也長安觀亦有  
玉藥花劉禹錫所謂玉女來看玉樹花異香先引七香  
車是也唐內苑亦有玉藥花李德裕與沈傳師草詔之  
夕屢同玩賞故德裕詩云玉藥天中樹金闕昔共窺傳  
師和云曾對金鑾直同依玉樹陰是也招隱山亦有玉

藥花李德裕所謂吳人初不識因余玩賞乃得此名是  
也由是論之則玉藥花豈一處有哉其非瓊花明也東  
坡瑞香詞有后土祠中玉藥花之句者非謂玉藥花止  
謂瓊花如玉藥之白耳 西溪叢語唐昌觀玉藥花今  
之散水花揚州瓊花今之聚八仙但木老耳 花經瓊  
花二品八命聚八仙六品四命 山房隨筆揚州瓊花  
天下祇一本士大夫愛重作亭花側扁曰無雙德祐乙  
亥北師至花遂不榮趙崇國炎有絕句弔曰名擅無雙

氣色雄忍將一死報東風他年我若修花史合傳瓊妃

烈女中 代醉編傳記所載揚州瓊花天下祇一本及

觀西吳里語復云宋時德清嶽祠廡下有瓊花一本春  
時盛放每告朔設會特開數朶時號月旦花則彼時此  
花已有二本矣 花史景定間濠州曾主簿入廣西宿  
某驛傍民舍主人邀坐丰儀甚雅庭有奇花數盆曾曰  
曾見廣陵瓊花否主人曰有即入折一枝以授曾持入  
驛回顧民舍無有矣視瓊花茅也

集藻辨增宋鄭興裔瓊花辨瓊花天下無雙昨因北騎  
侵軼或謂所存非舊疑黃冠以聚八仙補種其處未知  
然否屬自合肥易鎮來此所覩郡圃中聚八仙若驟然  
過目大率相類及細觀熟玩不同者有三瓊花大而瓣  
厚其色淡黃聚八仙花小而瓣薄其色漸青不同者一  
也瓊花葉柔而瑩澤聚八仙葉麤而有芒不同者二也  
瓊花藥與花平不結子而香聚八仙藥低於花結子而  
不香不同者三也余尚未敢自信嘗取花雜示兒輩皆

能識而別之始乃無疑適后土祠宇頗敝鳩工撤舊鼎  
為增建時當季夏非花放之日忽一枝負然特開於其  
杪郡人競觀莫不嘉歎余生罕信奇詭倘非目擊則謂  
好事者誇誕今觀此靈豈非司花之神鑒予之信心乎  
故為之辨以驗來者 明郎瑛瓊花辨雍錄辨梔子花  
即玉藥花改之為山礬者王荊公以其花葉可以染黃  
不借礬而成色之故野客叢書又載揚州后土廟玉藥  
花序文序文以玉藥即瓊花也改之為瓊花者宋王元

之之更也予意瓊花在宋極名之勝今作詩與序者又  
皆宋人必不差矣使果一種則梔子江南到處有之胡  
為至貴而揚州者名傳千古耶及考揚志謂瓊花或云  
唐植今雍錄亦以玉蘂唐惟長安一株元白等賦詩貴  
重又曰花白心黃三四月間開開時芬芳滿野高可數  
丈意即今之梔子千葉者耶但花大樹高如粉團耳不  
然何二書相符後世不傳惜江南未能收護使高大也  
況生于陝移于揚汴在彼亦自為奇矣但齊東野語以

色微黃似與雍錄一樹瓏鬆玉刻成小有間也昨見宋  
畫瓊花真似野八仙但多一頭九朶簇成者然亦未知  
孰是

記增宋杜旂瓊花記余自京口過揚州尋訪舊事知世  
所傳后土瓊花在今城之蕃釐觀亟往謁蕃釐觀瓊花  
猶在然余聞紹興辛巳之交金人入揚州已揭其本而  
去何從復得此種也觀壁有諸公所紀載直排世俗偽  
謂道士以聚八仙嗣其名聚八仙葉瓣色香皆不類余



曾不及見二花開時類不類不得知獨怪金人既揭其  
本復何從得此種也有老道士出鬚髮皓然自言生於  
崇寧間今八十有六載矣能叙今花本末余與對坐於  
花之亭西改容而問道士指花之根榦而言曰此某手  
所培養而至此者也指觀之大門而言曰此向之殿廬  
處也指所坐之亭曰此向之無雙亭處也花舊在無雙  
亭下殿西之北自紹興十五年向龍圖子諲以殿廬面  
勢狹小徙置轉後則花當殿西之南更三十一年知郡

事劉澤復命移花於殿之前即今之花處乃是歲八月十五日也初二十四年時直花之東南離三四尺許儻然一小根枝葉日茂其下大徑寸至其放時鄉踈背密移之不敢易又十一月金人渡淮趨揚州直入觀謁花本去其小者翦而誅之于時某方避亂奔走初亦不知也寇既退某始以十二月來舊地是時訓練官成平領兵馬依觀屯寨其軍人接某曰觀主至耶瓊花已壞鹵手旁有一小根微見地面可識認非其種乎某心知之

難以口舌定惟告以瓊花若剔其根皮投之火則臭達于鼻于是剔其根皮投之火果臭達于鼻軍人皆喜歡某即默禱后土移植之花處日往護之越明年二月既望夜中天大雷雨某詰朝起視兩廡蚯蚓布地皆滿往所植根旁則勃然三蘖從根出矣自是遂條達不已至于今三十年之久見其婆娑偃蓋常不忘斷根時也道士既言余為之竦然曰盛衰感應之理豈可不知其故哉夫他日不生小根而儵然起于二十四年兆先見也

去辛巳八年者以養穉也離離且三四尺許者不併揭也翦而復萌者終盛也天大雷雨蚯蚓布地而三蘖勃然者蚯蚓伏深壤陽氣驟趨之則動植俱奮也以人事言之不知趙孤漢孤之不亡何以異是自微而存存而有力扶植成就以至後日則程嬰丙吉之功道士宜獲其報今之享上壽倘有相之者余恐道士亡後來者無以知今花本末而其疑不解也故序而書之其間歲月事故之參錯煩委有可附見者悉不敢略以知其不誣

若其他靈異甚多未暇及也道士姓唐名大寧余實金華杜旂紹興二年記

賦增宋張問瓊花賦揚州后土祠瓊花經兵火後枯而復生今歲尤盛邦人喜之以為和平之證也乃賦之賦曰偉赤社之會都滋黑壤之饒沃萃溫潤之秀氣發英華於地軸是為瓊花異于凡木香凝媚服之蘭色瑩光明之玉託根后土之祠擢榦蜀岡之麓曾不知其歲年亦弗紀于圖錄欲問司花之女但注詩人之目謂天下

之一株冠羣葩之芬馥豈唐昌之餘芳載後庭之遺曲  
者乎當其風入琳宮春歸華屋萼拆青綃色凝寒綠枝  
珊瑚兮鏤雪冰蘂珠璣兮爛金粟真庭靜兮朝曦麗其  
纖穠仙籞深兮瑞露滋其芬郁瑶林瑰艷之蔥蒨閨苑  
琪英之燿煜若葢而繡似壁而穀如黃琮瑚璉璀璨于  
裡壇而文珠珮環玲瓏乎衣鞠桂娥競爽借月影于冰  
蟾阿母來觀下雲輶于皓鵠儷靚容于茉莉抗素馨于  
蒼蔔笑玫瑰于塵凡鄙荼蘼于淺俗惟水仙可並其幽

閒而江梅似同其清淑真絕代之無雙久彌芬于幽谷  
若乃聚八仙之殊種玉蝴蝶之別族葉扶踈而韻不勝  
色近似而香不足猶瑾瑜琬琰之粹溫豈砒砒堅珉之  
碌碌葢艷冶爭妍者衆之所同而蠲潔尚白者我之所  
獨是以兵火不能焚邊塵不能辱根常移而復還本已  
枯而再續疑神明之護持偏化工之茂育抑將薦瑞于  
太平而致祥于玉燭 元郝經瓊花賦并序中統二年  
春三月制使李公致瓊花數枝是年冬十月而夢二客

相邀至維揚之后土祠飲於花下嘯歌為樂既醉而覺  
乃作賦焉辭曰江風吹雲枕壓霜月神不棲目軼思超  
越栩栩曳曳境與世別天宇闢凡蹤絕歷蘭路開桂闕  
飄飄乎馮高御空不知身之幾何而造乎虛白已而扶  
搖頽頽恍惚莫量疑在鈞天亦如巫陽孤鶴飛來縞衣  
玄裳翩然負予背風翱翔下視淮海雉堞相望貝錯珠  
瑩接屋連墻繡簾瑤櫳綺疏綠房十里一市金紗煌煌  
混灝海之魚龍駭飛埃而陸梁忽丹青之二仙翥青鳥



以相將指仙花以為言可醺月而飛觴是閨苑之仙根  
來瑞世而呈芳拆膩雪以搖碧刻春冰而帶黃噴藥蝶  
於花心引輕絲而不狂天風收其落英不委地而飄揚  
彼衆卉則俗死漫紅妖而綠倡玉陰婆婆徒倚徜徉清  
香忽來莫知其方乃誦明月之曲歌窈窕之章倚歌橫  
簫鏘鳳鳴凰挹芳瀾之浩渺傾墜露之淋浪卷瓊瑤於  
杯盤吸霜露於肺腸欲折枝而不敢懼真宰之或傷且  
對花而舉酒澆遯世之茫茫倏焉玉女隔花而語髣髴

花香是為花主謫自瑤華以臨后土翦冰綃以為裳染  
麝麝於金縷拂白霓而下征曳秋霞而輕舉現仙姿於  
塵寰寓風神於月府且曰有妹其字飛瓊適來瑤池善  
為新聲與君佐酒以薦予誠遽作穿雲振搖瓊英說仙  
家之幽杳詠蓬壺與赤城閱花朝以逍遙駐芳姿以輕  
盈嗟胡為乎斯世而沉冥於此生也時予既醉二仙亦  
去花落尊空歌殘玉樹斗轉參橫脫兔驚寤餘香冉冉  
月滿牕戶乃為記夢之歌歌曰玉宇春兮花始開與二

仙兮飄然而來花亦喜兮搖搖乎瓊瑰掇飛英兮汎酒  
杯飛仙為我兮歌以累累亦既醉兮胡不歸花滿袖兮  
香滿幃謂予是夢兮余不疑嗟時之人兮孰非夢之為  
五言古詩增宋韓琦后土廟瓊花維揚一株花四海無  
同類年年后土祠獨此瓊瑤貴中含散水芳外圍蝴蝶  
戲醪醕不見香芍藥慚多媚扶疎翠蓋圓散亂真珠綴  
不從衆格繁自守幽姿粹嘗聞好事家欲移京轂地既  
違孤潔情終誤栽培意洛陽紅牡丹適時名轉異新榮

託舊枝萬狀呈妖麗天工借顏色深淺隨人智三春愛  
賞時車馬喧如市草木稟賦殊得失豈輕議我來首見  
花對花聊自醉

七言古詩增宋徐積瓊花歌春皇自厭花多紅欲得花  
顏如玉容春皇青女深相得先教斂與秋霜色乃有雪  
月供光星榆獻白蚪量銀漢琉璃濕人間美玉搗作灰  
荆山崑山鬼神泣天上有人名玉女投壺之外能為素  
姑射神人解種花先須此物為根芽天鑄地竅掬精粹

蟾身驪頷偷光華其時正值天地交二氣上下陰陽調  
此花孕育得其正其間邪氣無纖毫所以其色為正色  
出乎其類拔乎萃一如君子有諸內粹然其色見於外  
三月將盡四月前百花開盡春蕭然揚州日暖花開未  
春香不動花房閉仙掌秋高玉露濃鮫人泣下珠璣碎  
黃鸝本是花中客啼盡好聲求不得春皇費盡養花心  
春風使盡開花力春歸鶯去花始開誰人放出深閨來  
唐家天子太平時太真浴罷華清池紅裳繡袂厭君眼

更作地仙披羽衣麻姑睡起蓬萊島風吹玉面秋天曉  
洛川女子能長生水中肌骨成瑤瓊褒姒不見諸侯兵  
盡日不笑如無情宋玉移家安在哉東鄰不畫臙脂腮  
卓文君去成都速錦衣金翠慵裝束吹簫容貌果何如  
見說其人名弄玉若比此花俱不足淫妖恠艷文之累  
一如婦人有賢德不為邪色亂正色孀居之女能自持  
終身惟著大練衣又如正色立朝者不以柔媚為姦欺  
以此論之乃可重人之不正將胡為論德乃是花之傑

論色乃是花之絕洛陽花名古云好看花須向揚州道  
君不見去年花下吹黑風霹靂閃電搜玉龍此時半夜  
花光中不覺屈曲蟠長虹又不聞天上琳琅樹種在烟  
霞最深處白雲枝葉白玉英此花莫是琳琅精此花愛  
圓不愛缺一樹花開似明月襄王半夜指為雲謝女黃  
昏吟作雪杏花俗艷梨花麤柳花細碎梅花疎桃花不  
正其容治牡丹不謹其體舒如此之類無足奇此花之  
外更有誰世非紅紫不入眼此花何用求人知詩人自

與花相期長告年年乞一枝 方岳非瓊花舊聞瓊花

無與雙專奇擅美名此邦江南清夢入詩府安得一念  
令心降去年騎鶴揚州住斗酒屢眠雲霧窓月寒雪冷  
花未吐正爾俗葉凡株椿心期妙處在真實不假羽節  
青霓幢今春訪花吾第一自折繁枝盛翠缸橫看倒睨  
掉頭語前詩後賦何其咙真珠碎簇玉蝴蝶直與八仙  
同一腔聞名見面足笑莞強為花辨幾愚蠢有如巨賢  
雜羣小望而可識為奇厖陳餘張耳信相似一等人耳



無純尤忠耶佞耶豈難別祝鮒不類闕龍逢試持此論  
訊后土謂予不信如長江再用韻酬朱行甫夢中翠  
鳳飛來雙駕言后土游名邦手持玉簡判紅紫斂衽欲  
以詩城降粹容喜動日月角揖我入對玲瓏窓為言瓊  
花返蓬閬下界久矣無根椿乃今存者質本耳補亡以  
紿青油幢人間識真蓋亦寡載酒嘉賓寧論缸黃冠誕  
謫謹勿信傳訛聽舛其言吮為花作辨誰氏子謬妄譜  
入黃鐘腔耳庸目陋惑世俗其罪不能三赦卷朱雲之

孫亦奇士文有氣骨豐而麗謂瓊赤玉匪為白不比俗  
論紛茸尤詩筒往來捷于響夜發嚴鼓聲逢逢咨爾岳  
為謝此老壯哉寸管飛濤江 元趙文瓊花上天歌朔  
風吹沙堆浪白二十四橋沈冷月顛風夜半撼蕪城雪  
萼瓊綵破空碧金瓶歲歲獻君王玉罌泛酒連花香明  
光殿暗沙漠遠人自無情花斷腸落蘂飛天識天路何  
如拔樹飛昇去唐昌游女再歸來城中只有瓊花露江  
南俘客吟如叫想像裁辭不成調天宮夜半按霓裳玉

女擎花紫皇笑 謝應芳瓊花行送盛克明教授歸維

揚揚州好花非不多奈爾絕品無雙何水沈香漬素為  
藥琉璃滑葉青瑤柯東風二月花時節二十四橋香浸  
月小山叢桂避芳塵東閣官梅褪殘雪向來名士多品  
題括香御史今亦知何日移春獻天子不負此花天下  
奇

七言律詩增宋劉敞無雙亭觀瓊花贈聖民東方萬木  
競紛華天下無雙獨此花那有雪英凌暖日不為琪樹

隔流沙祠城寂寞春空老江雨冥濛日易斜仙品國香  
俱妙絕少傾高興盡流霞方岳約黃成之觀瓊花予

不及從以詩代簡杜宇聲中鬢欲華春風將綠又天涯  
欠隨江夏無雙士共看揚州第一花想像煙雲人跨鶴  
淋漓詩句字棲鴉蹇驢不管唐衫濕醉兀歸鞍暮雨斜  
王洋瓊花愛奇造物翦瓊瑰為鎮靈祠特地栽事紀  
揚州千古勝名居天下萬花魁何人斫却依然在甚處  
移來不肯開浪說八仙模樣似八仙安得有香來鄭

良嗣和王洋瓊花玉立洞庭久不衰  
俄經翦伐重能栽  
端知妙護有神力  
更喜當時殲厥魁  
種不他傳焉得子  
年將豐稔輒多開  
天生異物初無伴  
只許翻階近侍來  
徐意一謝瓊花瓊蕤走送寶瓶花  
愧乏詩情游拜嘉  
一種清香來月殿  
十分雅態出仙家  
細看后土春冰薄  
未覺劉郎日影斜  
擬跨胎禽塵幾隔  
珠簾十里自繁華  
賈似道瓊花寂寂  
蕃釐觀裏花  
伊誰封植得名嘉  
應知天下無他本  
惟有揚州是爾家  
種雪春溫團影密  
攢

冰香重壓枝斜倚  
闌莫問榮枯事  
付與東風管物華

玉月浦瓊花  
舊釐觀裏瓊花樹  
天地中間第一花  
此種從何探  
原委東風無處著  
繁華千鬚簇  
蝶團清馥九萼  
聯珠異衆葩  
幾見朱衣和露翦  
金瓶先進帝王家

五言絕句  
增宋俞清老瓊花  
因此瓊花發  
維揚勝洛陽  
若無三月雨  
占斷一春香

七言絕句  
增宋王禹偁后土廟瓊花詩二首并序  
揚州后土廟有花一株  
潔白可愛且其樹大而花繁  
不知實

何木也俗謂之瓊花因賦詩以狀其態云誰移琪樹下

仙鄉二月輕冰八月霜若使壽陽公主在自當羞見落

梅妝春冰薄薄壓枝柯分與清香是月娥忽似暑天

深澗底老松擎雪白婆娑劉敞移瓊花詩并序自淮

南遷東平移后土廟瓊花植於濯纓亭此花天下只一

株耳永叔為揚州作無雙亭以賞之彼土人別號八仙

花或云李衛公玉蘂花即此種淮海無雙玉蘂花異時

來自八仙家魯人未覩天中樹乞與春風賞物華秦

觀瓊花無雙亭上傳觴處最惜人歸月上時相見異鄉  
心欲絕可憐花與月應知 呂本中謝人送瓊花凝烟  
欲滿讀書窓忽有瓊花樹小缸更喜風流好名字百金  
一朵號無雙 斷腸風味久難尋尚有名花寄此心折  
盡春枝春已晚只宜良月不宜陰 趙師秀瓊花香得  
坤靈秀氣全藥珠團外蝶翩翩親魯后土祠中看不是  
人間聚八仙 顏芝宿瓊花后土祠中三月暮瓊花放  
後有蜂來東君不怕春歸去留待詩人一夜開 元尹



廷高瓊花無雙亭下萬人看欲覓殘英一片難夜靜月  
明猿鶴唳誤翻玉雪墮闌干舒頔蕃釐觀天上奇花  
玉色浮祇留一種在揚州如今后土無根蒂蜂蝶紛紛  
各自愁楊維禎宮詞后土瑤仙屬內家揚州從此絕  
名花君王題品容誰並萼綠宮中萼綠華

詩散句增元宋无雪讓玲瓏巧冰銷刻鏤瑕人間惟獨  
爾地上更何加萬蘼殊寥落羣芳避艷邪玫瑰誠執御  
芍藥等泥沙宋韓琦千點真珠擎素藥一環明玉破

香葩 陳傳良且將書寄南來雁為問瓊花果是非

唐曹唐雲隴瓊花滿地香 元郝經東風吹落瓊花雨

詞增宋劉克莊昭君怨后土祠中標韻天上人間一本

道號玉真妃字瓊姬 我與花曾半面流落花前重見

莫把玉簫吹怕驚飛 向子諲醜奴兒無雙亭下瓊花

樹玉骨雲腴傾國稱姝除却揚州是處無 天教紅藥

來驂乘桃李先驅總作花奴翠擁紅遮到玉都 又虞

美人去年不到瓊花底蝶夢空相倚今年特地趁花來

却欲不教同醉過花開  
花知此恨年年有也伴人俱  
瘦一枝和淚寄東風應把舊愁新恨入眉峰  
又去年

雪滿長安樹望斷揚州路今年看雪在揚州人望蓬萊  
深處若為愁  
而今不恨伊相誤自恨來何暮平山堂  
下舊嬉游只有舞春楊柳似風流  
晁補之下水船百

紫千紅翠惟有瓊花特異便是當年唐昌觀中玉蕊尚  
記得月裏仙人來賞明日喧傳都市  
甚時又分與揚  
州本一朶冰姿難比曾向無雙亭下半酣獨倚似夢覺

曉出瑤臺十里猶憶飛瓊標致

馬莊父滿庭芳共慶

春時滿庭芳思一枝玉蘂非常少年游冶何但折垂楊  
曾向瑤臺月下逢解佩玉女翻香風光好真珠簾捲都  
勝早梅芳 人間無比並蝴蝶樹爭敢相方既春歸後  
此意難忘夜夢揚州萬玉飛魂共紫燕歸梁須行樂馬  
家花園不肯醉紅妝 鄭覺齋揚州慢弄玉輕盈飛瓊  
淡泞襪塵步下迷樓試新妝纔了注沉水香毬記曉翦  
春冰馳送金瓶露濕綈綺新流甚中天月色被風吹夢

南州樽前相見似羞人蹤跡萍浮問弄雪飄枝無雙  
亭上何日重游我欲纏腰騎鶴煙霄遠舊事悠悠但凭  
闌無語煙花三月春愁趙以夫揚州慢十里春風二  
分明月藥仙飛下瓊樓看冰花翦翦擁砌玉成毬想長  
日雲階竚立太真肌骨飛燕風流斂羣芳清麗精神初  
付揚州雨窓數朶夢驚回天外香浮似閨苑花神憐  
人冷落騎鶴來游為問江淮風景長空淡煙水悠悠又  
黃昏羌笛孤城吹起新愁周密瑤花朱鈿寶玦天上

飛瓊比人間春別江南江北曾未見謾擬梨雲梅雪淮  
山春晚問誰識芳心高潔消幾番花落花開老了玉關  
豪傑金壺翦送瓊枝看一騎紅塵香度瑤闕韶華正  
好應自喜初識長安蜂蝶杜郎老矣想舊事花須能說  
記少年一夢揚州二十四橋明月張翥喜遷鶯東風

吹盡但一片綠陰空留春恨后土祠荒飛瓊謫久還喜  
玉容堪認二十四橋夜月二十四番花信便載酒怕芳  
菲易老陰晴難穩嬌困羞起晚竚立畫闌淨洗閒脂

粉沉水濃薰蜂黃淡染自有絕塵香韻也知世間無對  
肯許浮花相近鳳簫遠待數枝折與玉峰人問 劉克

莊賀新郎辜負東風約憶曾將淮南草木筆端籠絡后  
土祠中明月夜忽有瑤姬跨鶴迴不比水仙低弱天上  
人間惟一本倒千鐘瓊露花前酌追往事怎忘却 移  
根應費仙家藥謾回頭關山信斷堡城笳作問訊而今  
平安否莫遣玉簫驚落但畫卷依稀描着白髮愧無渡  
江曲與君家子敬相酌酢新舊恨兩交錯 馬莊父賀

新郎客裏傷春淺問今年梅藥因甚化工不管陌上芳  
塵行處滿可計天涯近遠見說道迷樓左畔一似江南  
先得暖向何郎庭下都尋徧辜負了看花眼古來好  
物難為伴只瓊花一種傳來仙苑獨許揚州作珍產便  
勝了千千萬萬又却待東風吹綻自昔聞名今見面數  
歸期屈指家山晚歸去說也稀罕施芸隱摸魚兒柳  
蒙茸暗凌波路煙霏慘淡平楚七香車駐猊璫掩遙認  
翠華雲母芳景暮鴛鴦悄銖衣來按飛瓊舞淒涼洛浦



漸玉漏沉沉清陰滿地乘月步虛去 銷凝處誰說三生小杜翔螭聲斷簫鼓情知禁苑酥塵浣羞與倡紅同譜春幾度想依舊苔痕長印唐昌土風流千古人在小紅樓珠簾半捲香注玉壺露

山礬花

原作芸香入卉譜按山礬木本非古所謂芸草自沈括筆談以為七里香而李時珍

本草綱目遂以為芸香不知芸草與山礬或皆有七里香之名而反疑芸香之非一種也誤矣

今分山礬

花譜芸草

別見卉譜

即海桐

原山礬一名栳花一名瑒花

周必大云栳音陣出南史荆俗訛栳為鄭呼為鄭礬

江南又訛鄭為  
瑒也瑒音暢

一名春桂一名七里香黃庭堅易其名

為山礬

增學圃餘疏山礬一名海桐樹婆娑可觀花

碎白而香宋人灰其葉造黝紫色

本草生江淮湖蜀

野中樹大者株高丈許其葉似庵子葉生不對節光澤  
堅強略有齒凌冬不彫三月開花繁白如雪六出黃藥  
甚芬芳結子大如椒青黑色熟則黃色可食其葉味漚  
人取以染黃及收豆腐或雜入茗中

彙考增三柳軒雜識山礬為幽客

瓶花譜山礬四品

六命 瓶史山礬潔而逸有林下風魚玄機之綠翹也  
原春風堂隨筆辛丑南歸訪舊至南浦見堂下盆中  
有樹婆娑鬱茂問之曰此海桐花即山礬也因憶山谷  
賦水仙花云山礬是弟梅是兄但白花爾却有歲寒之  
意 四川志邛縣出山礬花色白如雪香氣極遠

集藻七言古詩增宋清非居士黃龍山中春事晚山谷  
道人上山坂鼻端山礬花氣濃怪底經行衆芳苑一種  
風姿極可人幽姿正色相鮮新素馨籍甚不足意黃淡

羞澀終非真 明許伯旅題林周民山礬圖山礬入畫  
古所少我昔見之倪瓚家問君何處得此本水屋十月  
來春花東風著樹香滿雪長鬚露滴金粟結一枝獨立  
霜霰餘已覺江梅是同列惜哉此物知者稀深林大谷  
多所遺牧豎樵童爾何苦剪伐每同荆棘歸林君本是  
鰲頭客高卧雲間人莫識酒酣揮袖卷新圖一笑西山  
眼中碧

五言律詩增宋薛季宣栳花唐王禪花介甫謂之瑒花

魯直謂之山礬武昌山中多有之其葉可供染事土人  
用之釀酒枯綠吐瑤琨冷然郭外村仙人來玉藥文士  
立山礬芳澤留絲素風流付酒樽莫言瑒酷似香處不  
勝繁

五言絕句增宋趙汝鐸山礬七里香風遠山礬滿嶺開  
野生人所賤移動却難栽

七言絕句原宋黃庭堅題高節亭邊山礬花并序江南  
野中有一種小白花本高數尺春開極香野人謂之鄭

花王荆公嘗欲作詩而陋其名予請名曰山礬野人采  
鄭花葉以染黃必借礬而成色故名山礬海岸孤絕處  
補陀山譯者謂小白花山予疑即此花爾不然何以觀  
音老人端坐不去耶高節亭邊竹已空山礬獨自倚春  
風二三名士開顏笑把斷花光水不通 北嶺山礬取  
次開輕風正用此時來生平習氣難料理愛著幽香未  
擬回 增曾幾山礬青雲葉底雪花繁只與田家插鬢  
鬟不枉涪翁初著句能令大士久開顏 謝邁山礬一

樹山礬宮樣妝曉風微送雨中香鼻端空寂誰知許莫

恠狂風取次狂 方岳山礬只有江梅合是兄水仙終

似號夫人李方正爾難為弟每恨詩評未逼真 原張

季靈山礬漫山白藥殿春華多貯清香野老家須向風

前招蝶使秘通家籍省梅花 鄒艮山山礬折來隨意

挿銅壺能白能香雪不如匹似梅花輸一著枝肥葉密

欠清癯 祝穆山礬玲瓏葉底雪光寒春盡香薰草木

間移植小軒共燕坐恍疑身在普陀山

詩散句原宋魯幾可惜不當梅蘂破幽香合在弟兄間  
增楊萬里玉花小朶是山礬香殺行人只欲顛原  
明孫黃山礬花落春風起

詞原宋徐俯南柯子細葉黃金嫩繁花白雪香共誰連  
壁向河陽自是不須湯餅試何郎  
婀娜璵璣輕盈  
淡薄妝莫令韓壽在伊傍便逐遊蜂驚蝶過東牆

別錄原種植此物最易生春月分而壓之俟生根移種



御定佩文齋廣羣芳譜卷三十七

謹案第二十九頁後一行二行欲覓殘英一片難  
夜靜月明猿鶴唳刊本英訛陰鶴訛夜據宋詩  
本改

第三十三頁後八行一名栳花刊本栳訛掟今改





總校官庶吉士臣侍朝

校對官檢討臣王福清

謄錄舉人臣勵守訓